

PILIPAI

Kipihac wê Pol kivuu vô tibii

Pilipai ge

¹ A, Pol, hixôn Timoti, xii ga Yesu Kîlisi nue yuac. Xii kivuu kipihac ga mi vông i loc vô xam vihati gê vigwe Pilipai, xam gyovixa dì xam wê xam vông yuac vac konglegesen ge hixôn xam vihati wê xam vông i vin Yesu Kîlisi ge.

² Il Mag Anutu hixôn Apumtau Yesu Kîlisi yuu i vông vizid nivîha hixôn kiyang malehe i hivun xam xôn.

Pol pimil Anutu ên tibii Pilipai

³ Tiyi buc vihati wê a mi xo xam ge od a pimil Mag Anutu ên xam, ⁴ dì buc vihati wê a kitaa vô Anutu lec xam ge od a kitaa hixôn xêgyaa nivîha ⁵ ên wê xam vông yuac xolac hixôn a taxlee dì i lam tyip gwêbaga hixôn ge. ⁶ Om a xovô ên a nêbê Anutu vông yuac nivîha vac xam nilôm, om ob vông yuac vac xam nilôm i tiyi buc vihati dì i loc tyip lec buc wê Yesu Kîlisi obêc lop mi lôm ge. ⁷ Om môp wê a xêgyaa nivîha ên xam ge, ge môp bôbac, ên a xo xam yêp vac nilôg lec buc vihati, ên xam mi ngidu a xôn om Anutu vông vizid nivîha vô il tiyi buc vihati, gwêbaga wê a lam dô vac xumac kalabuhu ge hixôn buc wê a dô vixun dì a nêl xolac vô xomxo ên a nêb he i xovô bê Anutu xolac ge kiyang nôn. ⁸ Anutu yê wê a vông nilôg hixôn piyôp vihati ge loc vô

xam, ên Yesu Kilisi vông a xêgyaa vin lec xam vihati.

⁹ Dì a kitaa vô Anutu ên a nêbê i vông môt xêyaa vin lecên wê xam vông ge i vô levac, dì i vông xovôên levac hixôn piyôp niviha vô xam, ¹⁰ tiyi wê xam ob yaxên môt vihati nêb niviha me nipaên ge. Om timuên wê Kilisi obêc vena ge od xam obêc dô niviha dì kiyang ti ob yêp vô xam lêm, ¹¹ dì môt niviha wê xam vông ge ob vô nôn niviha vô xam i luu vêl ya xêkizêc wê Yesu Kilisi vông ge. Om xomxo ob yê dì pîmil Anutu dì vông i lê i vô levac.

Wê Pol dô vac kalabuhu gê Lom ge od ngidu xolac xôn

¹² Xam lige, a nêb a ob nêl kitong vô xam ên xam xovô bêga bê gwêbaga a lam dô vac xumac kalabuhu lê, lêc viyin tiga o le vac xolac xôn lêm. Nge, vông xolac vô levac, ¹³ om tibii vevac wê bin xumac kalabuhu ga hixôn gavman levac Sisa ben ge, he vihati hixôn xomxo baba xovô nêbê tibii tung a lam dô vac xumac kalabuhu ga ên wê a mi nêl Yesu Kilisi kitong vô xomxo ge. ¹⁴ Ilage lige vông vinên ya xona ên wê he ob nêl xolac ge ên he nêbê mêd tibii ob vông viyin vô he ên xolac. Lêc gwêbaga he tibeac yê dì xovô bê Apumtau ngidu a xôn vac kalabuhu, mêgem gwêbaga he le xêkizêc dì nêl Anutu xolac dì xonaên ma.

¹⁵ Vixôhilôg, he ya xêyaa vô nipaên ên wê a lêg vô levac ge, om he nêl Kilisi xolac ên nêb xomxo i yê he niviha dì vông he lê i vô levac nginoo a vêl. Lêc he ya nêl xolac dì o xo bêge lêm. ¹⁶ Nge, he xêyaa vin lec a om he nêl xolac kitong ên he xovô ên he nêbê tibii vông a lam dô vac kalabuhu ga

ên wê a ngidu xolac xôn ge. ¹⁷ Lêt he wê a nêl tax ge he nêb tibii i yê he dì vông he lê i vô levac ên yuac xolac, om he nêl Kilisi kitong, dì he o nêl xolac hixôn nilô tibed lêm. Nge, he nêl xolac ên he nêb he ob vông a lêg i tô dì vông a nilôg i vô viyin vac xumac kalabuhu ga. ¹⁸ Lêt a ob nêl kiyang ti lec wê he vông ge lêm. Ên xomxo ya nêl Kilisi kitong hixôn nilô niviha dì ya nêl hixôn nilô nipaên. Lêt he vihati nêl Yesu Kilisi kitong yêp seac, om a nilôg vô niviha.

¹⁹ Vixôhilôg, a nilôg vô niviha gwêbaga dì ob vô niviha timuêñ hixôn, ên a xovô ên a nêbê xam mi kitaa lec a, dì Myakîlôhô Ngibua wê Yesu Kilisi vông ge mi ngidu a xôn om ob vô a vêl ên viyin tiga. ²⁰ Om a xo vinux yang dì a dô bin wê Anutu ob ngidu a xôn, dì a ob vông nipaên ti wê a nig ob yoc ên ge lêm. Nge, a nêb a ob le xêkizêc vac vông vinêñ gwêbaga tiyi xocbê a le xêkizêc ilage, dì a ob xona ên xomxo ti lêm. A vông bêge ên a nêb a obêc dô magviha me a obêc xib ge od a ob vông Kilisi lê i vô levac. ²¹ Wê a dô magviha ga ge od a vông nilôg la yadiluhu vô Kilisi, lêt wê a obêc xib ge od a obêc kô vizid niviha luu vizid wê kibun ga vêl. ²² Lêt wê a gên dô magviha ga ge od a vông yuac niviha wê ob vô nôn niviha ge. Om môp yuu xôn niviha. Ngwe wê a ob dô magviha dì ngwe wê a ob xib ge. Om a obêc timu vô ga ngwe na? Ge a lungêñ. ²³ A nilôg vô yuu. A xêgyaa vin lec wê a ob xib dì la dô hixôn Kilisi. Môp ngwe ga luu ngwe wê dôen mavîha ge vêl. ²⁴ Lêt wê a obêc dô magviha lec kibun ga ge od ge wê a ob ngidu xam xôn. ²⁵ A xovô

kiyang tige pyap om a nêl bêga ên a nêbê a ob dô magviha lec kibun ga ên dô hixôn xam dì ngidu xam xôn ên xam lêc vông i vin xekizéc ta dì dô hixôn xêmyaa niviha. ²⁶ Mêgem buc wê a obêc loc dô hixôn xam ge od ge wê xam xêmyaa ob vô niviha dì xam ob pimil Yesu Kilisi ên wê a vena vô xam ge.

Xomxo Pilipai hixôn Pol vông vevac ya xolac

²⁷ A nêl vô xam bêga bê môp vihati wê xam nêb xam ob vông ge, xam vông i tiyi wê Kilisi xolac nêl ge. Om a obêc loc vô xam dì xê môp wê xam vông ge, me a obêc dô teva dì ngô kiyang lec môp vihati wê xam vông ge, od a nêb a ob xovô wê xam le xekizéc ta hixôn nilôm tibed dì vông vevac ya xolac hixôn piyôp tibed ên xam nêb xomxo i ngô dì vông i vin. ²⁸ Dì a nêb a ob xovô wê xam o xona ên xomxo wê vông vevac vô xolac ge lêm. Ên xam obêc xona ên he lêm ge od obêc vông xovôen vô he bê Anutu obêc kitya he vêl timuên, dom xam ge xam ob dô niviha. Ên Anutu vaci wê ob vông xam dô niviha hixôn i ge. ²⁹ Ên Anutu nêb Kilisi lê i vô levac, om vông môp yuu vô xam ên nêb xam timu vô. Ngwe wê xam vông i vin Kilisi ge, dì ngwe wê xam ob kilê viyin lec Kilisi lê ³⁰ dì vông vevac ya xolac ge. Ilage xam wê vevac wê a vông ya xolac ge dì gwêbaga xam ngô wê a gên dîvông vevac ya xolac tibêge. Om il xôn ob vông i yêp tibed.

2

Il ob pilepac il dì vô nipwo lec

¹ Xam dô vac Kîlisi vîgê vîlu kwa ngîbi om vông xam dô nivîha. Dì Kîlisi xêyaa vin lec xam om xam dô malehe, dì Myakîlôhô Ngîbua dô hîxôn xam dì ngîdu xam xôn. Dì xam xêmyaa mi vin lecma dì xam mi xo vîgwe vô pîsiv ênma. ² Vîxôhilôg, xam mi vông môt nivîha bêgee om a xêgyaa vô nivîha. Om a ob nêl vô xam bêga bê xam timu vô môt mangwe gae hîxôn bêga bê xam piyôp i tibed, dì xam timu vô môt xêyaa vin lecén tibed, dì nilôm i tibed, dì xam vông i vinma kiyang. Xam obêc vông bêge ge od ob vông a xêgyaa vô nivîha yang. ³ Le i lêc xo xacxam va lêm dì le i lêc yong xam lêm. Nge, xam pilepac xam dì vô nipwo lec dì wê xomxo vihati i tiyi xocbê he ngîn oo xam vêl ge. ⁴ Le i lêc viac xacxam va susu yuu yuac lêm. Nge, xam viac xomxo vihati susu yuu yuac êno dì ngîdu he xôn.

Kîlisi pilepac ici va dì vô nipwo lec

⁵ Xam timu vô piyôp i tibed xocbê Yesu Kîlisi xo ge. ⁶ Èn Yesu Kîlisi yuu ma Anutu dô nôn tibed lê, lêc Yesu o hôm môt wê yuu ma dô tiyima ge pilîhi lêm. ⁷ Nge, ici va sea lê levac wê i vông ge dì lam yubac gê kibun ga xocbê xomxo kibun ga ti dì vông yuac tiyi xocbê xomxo wê vidaaen ge ti. ⁸ Yesu tu xocbê xomxo kibun ti, dì pilepac ici va tu xocbê nipwo dì la vac Anutu kiyang kwa ngîbi dì vông i tiyi wê Anutu nêl ge dì i la tyip lec buc wê yib ge. Vîxôhilôg, yib lec xax pola. ⁹ Mêgem Anutu vông Yesu tu levac ngîn oo xomxo vihati vêl, dì vông lê wê ngîn oo lê vihati vêl ge vô i. ¹⁰ Anutu vông lê levac vô Yesu ên nêb

xomxo wê dô kisii ganê ge dì he wê dô kibun ga ge, hixôn he wê yib dì la yêp vac kibun nilô ge, he vihati ob ngô Yesu lê dì yev vixa kitu vô i, ¹¹ dì nêl kitong i yêp seac bêga bê, “Yesu Kilisi ge il ned Apumtau.” Obêc bêge ge od Mag Anutu lê ob vô levac.

Il ob dô xocbê xêseac ge vac xomxo mahigun

¹² Yesu vông yuac vihati i tiyi wê Anutu nêl ge, mègem xam lige wê a xégyaa vin lec xam ge, xam vông i tiyi wê Yesu vông ge. Ilage wê a dô hixôn xam ge, xam ngô a kiyang dì vông i tiyi wê a nêl ge. Léc gwêbaga a lam dô teva ên xam, om a ob nêl vô xam bêga bê xam ngô kiyang dì vông i tiyi wê a nêl ge i luu wê xam vông lec buc wê a dô hixôn xam ge vêl. Anutu vô xam vêl ên xam nêm nipaên, om xam vông i yuac xêkizêc ên yuac i vô nôn lec, dì xam xona ên Anutu dì xam nim i yoc ên môp nipaên. ¹³ Xam tiyi wê xam ob vông bêge, ên Anutu vông yuac vac xam nilôm, om ob vông xam xo môp yuu yuac wê i yê niviha ge, dì ob vông xam timu vô.

¹⁴ Yuac vihati wê xam ob vông ge, le i léc so vya vô yuac tige dì nêl kiyang tibeac lec lêm. ¹⁵ Xam sea môp tibêge êdêc nipaên ti i o léc yêp vô xam lêm. Nge, xam tu xomxo wê nivîha ge, ên Anutu nue ge wê nipaên ti o yêp vac he nilô lêm. Ên xomxo kibun ga wê dô hixôn xam gwêbaga ge, he ge xomxo nipaên wê dô vac mapitoc, ên he sea môp nivîha dì timu vô môp nipaên. Om xam dô vac he mahigun tiyi xocbê lam ên i vông xêseac vô he, ¹⁶ dì xam nêl Anutu kiyang wê ob vông he dô mavîha ge kitong vô he. Xam obêc vông

bêge ge od buc timuên wê Kîlisi obêc vena ge od a xêgyaa ob vô niviha ên xam, dì a ob xovô bêga bê yuac wê a vông vac xam mahigun ge, a o vông pîsiv lêm, dì a yuac o tô mi la lêm.

¹⁷ Vông vinên wê xam vông ge tiyi xocbê daa wê xam vông vô Anutu ge. Om tibii obêc hi a xib dì kipyax a hi sea ên wê a nêl xolac vô xam ge od pyap, ên obêc tiyi xocbê a êno vông daa vô Anutu. Om a xêgyaa ob vô niviha, dì il xôn nilôd ob dô niviha. ¹⁸ Mêgem a nêl vô xam bêga bê xam êno, xam xêmyaa i vô niviha, dì xam dô hixôn nilôm niviha i tiyi xocbê a ge.

Pol nêl Timoti yuac kitong vô tibii Pilipai

¹⁹ Apumtau Yesu obêc tyuc lec ge od a ob vông Timoti i loc vô xam Pilipai lutibed, ên i yê yuac wê xam vông ge, dêc lôm nêl kitong vô a, ên vông a xêgyaa i vô niviha. ²⁰ Xomxo ngwe xocbê Timoti ge o dô hixôn a lêm. Nge, Timoti tibed wê mi xo xam tiyi xocbê a mi xo xam ên a nêb a ob ngidu xam xôn ge. ²¹ Xomxo ya ge he mi xo heche va yuac yuu ninivi, dì o xo Yesu Kîlisi yuac lêm. ²² Dì Timoti mô ge, xam xovô ên xam nêbê xomxo niviha, ên mi ngidu a xôn vac yuac xolac tiyi xocbê nu ti ngidu ma xôn ge. ²³ Mêgem a nêb a ob vông Timoti i loc vô xam. Lêc gwêbaga a lungên môt wê gavman levac ob vông vô a ge. A ob yaxên lê, di vông Timoti i loc vô xam timuên. ²⁴ Lêc a xo ên a nêbê Apumtau obêc piwelac a vêl ên kalabuhu ga, om a êno obêc loc vô xam lutibed.

Pol nêl Epaplodaitas yuac kitong

²⁵ Ilage xam vông il lig vông vinên Epaplodaitas lam vô a ên xam nêb i kô xam mammôn di lam ngidu a xôn. Om i lam dô hixôn a di xii xôn vông yuac, di xii vông vevac ya xolac. Lêcom a xovô ên a nêbê a ob vông Epaplodaitas i lôc mî loc vô xam i tii vac nang, ²⁶ ên xam ngô wê yidac vông i ilage lêcom xam lungên wê yidac ma ge, om xam obêc dixo i. Mêgem vông Epaplodaitas nilô vô viyin di i dixo xam êno. ²⁷ Vixôhilôg nôn, ilage i vông yidac levac tiyi wê ob yib ge. Mêlêc Anutu xo vigwe pisiv ên i om vông i vô niviha lec. Di Anutu xo vigwe pisiv ên a êno, ên nêb viyin tige i o hivun a xôn lêm. ²⁸ Om a xo vinux ên a nêb a ob vông i lôc mî loc vô xam i tii vac nang, ên xam wê di xêmyaa i vô niviha, di i vông a nilôg i vô viyin maên. ²⁹ Mêgem buc wê obêc lôc mî loc vô xam ge od xam kô i lec niviha hixôn xêmyaa niviha di pîmil Apumtau lê. Di xam vông xomxo vihati wê tiyi xocbê Epaplodaitas gee lê i vô levac, ³⁰ ên Epaplodaitas ge vông Kilisi yuac, lêc yidac levac vông i om vô kwabo lec wê ob yib ge, lêc o xo ici va lêm. Nge, xovô nêbê xam nêb i kô xam mammôn di lam ngidu a xôn, om nêb ob vông yuac tige i ma lê.

3

Xomxo wê vông i vin Kilisi ge wê Anutu yê niviha

¹ Xam lige, a nêb a ob nêl kiyang xêxuhu ya hixôn bêga bê xam xêmyaa i niviha ên Apumtau. A nêl kiyang bêge vô xam ilage pyap, lêc a nilôg

o vô viyin ên wê a ob kivuu kiyang tige i tii vac vô xam ge lêm, ên kiyang tige ob ngidu xam xôn.

² Xam viac xam ên xomxo nipaên wê tiyi xochê noo vimen ge, ên he mi vông môp nipaên, dì xam xona nêm ên he Yuda wê ninivi gôlên ge. He gôl he ninivi ên nêb ob vông xovôên vô xomxo bê he Anutu nue. ³ Lêc he o Anutu nue lêm. Nge, il ga il tu Anutu nue nôn. Lêc il o tu Anutu nue ên wê il timu vô Yuda vông môp dì gôl il nidnivi ge lêm. Nge, il wê il tu Anutu nue ge wê Myakilôhô Ngibua ngidu il xôn dì il vông lilo vô Anutu, dì vông Yesu Kîlisi lê vô levac ge, dì il xovô bê Yuda vông môp kibun ga o tiyi wê ob vông Anutu yê il niviha ge lêm. ⁴ Lêc xomxo ya timu vô Yuda vông môp kibun ên he so ên he nêb mêd môp tigee ob vô he vêl ên he nêb nipaên. Om a obêc nêb a ob vông i vin i tiyi he ge od môp kibun wê vông a lêg vô levac ge ob nginoo wê he vông ge vêl. ⁵ Èn a ga, a Islel ti, ên a pum lec Bensamin wê Islel kehe viğê yuu dì yuu tô mi la (12) ge ti, dì a tag yuu mag ge Hiblu, om a êno Hiblu ti. A yubac, dêc buc viğê viłu dì sec yon lam la vêl, mêd ge wê tag yuu mag gôl a nignivi tiyi môp wê xe Yuda mi vông ge. Dì a kô yuac Palisi wê a mi viac môp wê Moses xolac vông ge vihati. ⁶ Dì a xo viñux ên a nêb môp vihati wê Moses vông ge tô vacên i ma, dì a so ên a nêbê xomxo wê vông i vin Yesu ge sea Moses xolac, om a vông viyin yuu myavînê vô he. Lêc xomxo ti obêc nêb yaxêñ môp wê a vông ge od obêc nêl bê a timu vô Moses xolac vihati om nipaên ti o yêp vô a lêm. ⁷ Môp tigee wê a vông ilage vông a lêg vô

levac. Lêc gwêbaga a sea môp tigee vihati di xê tiyi xocbê môp pileva ge, di a vông nilôg la yadiluhu vô Kilisi. ⁸ Vixôhilôg, a sea Yuda môp yuu yuac wê vông a lêg vô levac ge vihati yang, di gwêbaga a xovô a Apumtau Yesu Kilisi vaci ên a xovô ên a nêbê i luu môp yuu xovôên kibun ga vihati vêl. A nêb a ob timu vô Yesu, om a sea môp baba ge vihati di xê xocbê myapipu viadaâen ge ên a nêb a ob hôm Kilisi tibed pilahi, ⁹ di dô hixôn i. Ilage a xo bêga ên a nêb Moses xolac wê a mi timu vô ge ob vông Anutu yê a nivîha di nêl bê a xomxo bôbac ti. Lêc gwêbaga a o xo bêge lêm. Nge, a xo ên a nêbê Anutu ob yê a nivîha di nêl bê a xomxo bôbac ên wê a vông i vin Kilisi ge. Om môp tibed wê Anutu ob yê xomxo nivîha ge, ge môp vông vinên. ¹⁰ A nêb a ob xovô Kilisi vaci, di xovô xêkizêc wê i vông ge. Ên Kilisi kidi lec mavîha vac yibêن om xêkizêc wê i vông ge yêp seac, om a nêb a ob xovô xêkizêc tige. Di a nêb a ob kilê viyin i tiyi xocbê i kilê ge. Yesu kilê viyin mi yib lec, om Anutu ob nêbê a êno timu vô bêge ge od a ob kilê viyin di xib êno. ¹¹ A ob vông bêge ên a nêb a êno ob kidi lec magvîha vac yibêن.

*Pol tup mi la vô yôg wê xomxo ob ngînoo lec
ge*

¹² A o xo ên a nêbê a tu ngîbua xocbê Kilisi ge lêm, me a o xo ên a nêbê a vông môp vihati tiyi xocbê Kilisi vông ge lêm. Lêcom Kilisi vông a tu i xe, om a divông yuac xêkizêc ên a nêb a ob tu ngîbua xocbê i ge. ¹³ Xam lige, a xovô ên a nêbê a gên o tu ngîbua xocbê Kilisi ge lêm. Xovôên

wê a vông ge tibed bêga bê a ob xovô môp wê a mi vông ilage lêm. Nge, a ob xovô môp wê a ob timu vô gwêbaga mô, dì vông yuac xêkizêc êdêc kô vizid niviha timuên. ¹⁴ Om tiyi xocbê a tup ên a nêb a ob la vô yôg wê xomxo ob nginoo lec ge êdêc kô non. Om nôn wê a nêb a ob kô ge, ge wê Anutu ob tyuc a la dô hixôn i ge, ên wê a vông i vin Yesu Kîlisi ge.

¹⁵ Il vihati wê il xovô Kîlisi dì timu vô i ge, il piyôp i tibed i tiyi kiyang wê a nêl ga. Lêc xam obêc xo kiyang ba ge od Anutu obêc nêl kitong dì titô wê so ge. ¹⁶ Lêcom le i lêc sea xovôên niviha wê xam kô pyap ge lêm. Nge, xam hôm xôn pilihi yang.

¹⁷ Xam lige, xam tup vô môp vihati i tiyi môp wê a vông ge, dì xovô xomxo wê timu vô môp niviha vihati wê xe vông vac xam mahigun mi xam wê pyap ilage. ¹⁸ Ilage a nêl xomxo nipaên kitong vô xam tiyi buc tibeac, dì gwêbaga a ob nêl he kitong vô xam i tii vac nang, dì a magluc tyip ên wê he tibeac vông vevac vô Kîlisi xolac wê nêl ên nêbê i yib lec xax pola ge. ¹⁹ He timu vô môp wê heche va xovô ge, om ge tiyi xocbê he yev vixa kitu vô anutu ba. Dì he xêyaa vin lec môp nipaên wê ob vông xomxo ni yoc ge, lêc he ni o yoc ên môp tigee lêm. Dì he mi xo susu kibun ga, om obêc timuên ge od Anutu obêc kitya he vêl. ²⁰ Dom il vông vinêng ge, il bed wê Anutu ben kisii ganê, dì il dô bin Apumtau Yesu Kîlisi wê vô il vêl ên il ned nipaên ge, ên obêc kidi vac ben kisii ganê dì lop mi lôm i tii vac nang. ²¹ Buc wê Kîlisi obêc vena ge od obêc pilepac il nidnivi

kibun tiyi xocbê ici va ninivi wê nivîha yang ge ya xêkizêc wê i vông ge. Xêkizêc wê i vông ge tiyi wê ob vông xomxo yuu susu vihati la dô vac i kwa ngîbi.

4

Pol viac kiyang nivîha vô tibii Pilipai

¹ Xam lige, xam xovô ên xam nêbê Yesu obêc vena, om a nêl vô xam bê xam le xêkizêc hixôn Apumtau. A xêgyaa vin lec xam, dî a xo xam ngînong ên a nêb a ob xê xam i tii vac nang, ên xam mi vông a xêgyaa vô nivîha dî vông a lêg vô levac ên wê xam vông i vin Anutu xolac ge.

² A ob nêl kiyang vô vêx yuu, Yuodia yuu Sintiki, wê yuu dô vac xam mahigun ge. Om a ob nêl vô muu bêga bê muu sea môp wê muu kunacma ge dî xovô Apumtau dî vông nilôm i loc tibed vô i. ³ Dî a nêl vô xomxo ti wê xii vông yuac tibed ilage bêga bê ông ngidu vêx yuu ge xôn, ên ilage yuu hixôn Klemen dî xomxo ya wê vông yuac hixôn a ge, he vihati ngidu a xôn vac yuac xolac, dî he lê yêp vac Anutu kipihaç maviha wê nêl he wê obêc dô maviha luta lêc luta ge lê kitong.

⁴ A nêl vô xam vihati bêga bê xam xêmyaa i vô nivîha ên Apumtau i tiyi buc vihati. A ob nêl vô xam i tii vac nang bêga bê xam xêmyaa i vô nivîha.

⁵ Xam lum nêl kiyang vô xomxo vihati ên he i ngô dî xovô bê xam mi dô vac malehe. Buc wê Apumtau obêc vena lec ge vô kwabo lec. ⁶ Xam nilôm i lêc vô viyin ên susu me viyin ti lêm. Nge, xam kitaa vô Anutu lec susu vihati wê xam nêb

xam ob kô ge dì kitaa lec viyin vihati wê val vô xam ge. Xam kitaa vô Anutu dì hi vixam i pec dì pimil i, ⁷ ên xam obêc vông bêge ge od môp malehe wê Anutu vông ge ob vông xam piyôp yuu nilôm la tibed vô Yesu Kilisi. Môp malehe wê Anutu vông ge luu xovôên wê xomxo toto vông ge vêl.

⁸ Xam lige, a ob nêl kiyang ngwe vô xam i tii vac nang. Xam xovô môp tigae bêga bê môp wê nôn ge, dì môp wê piyôp niviha vông ge, dì môp wê bôbac ge, dì môp wê o ningeac lêm ge, dì môp wê xêseac ge, dì môp wê xam lêm ob yêp niviha ge, dì môp wê vông xomxo vô niviha ge, dì môp vihati wê il xovô ên il nêbê niviha ge. Môp tigee vihati xam xovô i luu vêl dì hôm xôn mi i yêp vac xam nilôm. ⁹ Môp vihati wê a tixuu xam ya mi xam xovô pyap ge, dì môp wê a nêl mi xam ngô ge, dì môp wê a mi vông vac xam mahigun dì xam wê ge, xam lêc timu vô môp tigee vihati, ên xam obêc vông bêge ge od Anutu wê kiyang yuu môp malehe kehe ge obêc dô hixôn xam.

Tibii Pilipai vông mone la vô Pol

¹⁰ Ilage xam xo ên xam nêb xam ob ngidu a xôn ya mone lê, lêc xam tiyiên ma. Lêc gwêbaga xam tiyi wê xam ob ngidu a xôn ge dì om xam xo a tii vac nang dì ngidu a xôn ya mone, om a xêgyaa vô niviha yang dì a pimil Apumtau. ¹¹ A o nêl ên a nêbê susu ma ên a lêm. Ên a xovô pyap ên a nêbê niviha me nipaên obêc val vô a ge od pyap, ge a xêgyaa ob vô niviha. ¹² A tiyi wê a ob dô susu maên ge, dì a tiyi wê a ob tulec susu tibeac ge. A xovô wê yaên tibeac ge dì a xovô wê

dôen vip ge. A xovô môp wê tulec ên susu ge di môp wê susu maên ge. Vac nivîha yuu nipaên ge a xovô môp wê a xégyaa ob vô nivîha tiyi buc vihati ge. ¹³ Kilisi vông xêkizêc wê i vông ge vô a, om a tiyi wê a ob le xêkizêc vac viyin yuu xôn nivîha di vông yuac wê i vông vô a ge vihati.

¹⁴ Lêc xam vông môp nivîha vô a ên wê xam ngidu a xôn ên viyin wê tulec a ge. ¹⁵ Xam Pilipai, xacxam va xovô pyap ên xam nêbê buc taxlee wê a kô yuac xolac di sea vigwe Masedonia ge od konglegesen ngwe o ngidu a xôn lêm. Nge, xacxam va ngidu a xôn di vông mone vô a ên nêb il ngiduma xôn ên yuac i yêp nivîha. ¹⁶ Di buc wê a la dô vac vigwe Tesalonaika ge od xam vông mone lam vô a lu yuu. ¹⁷ Lêc a o xo mone me susu ên a nêb xam vông i lam vô a lêm. Nge, a xo xam môci ên a nêb môp nivîha tige wê xam mi vông ge i vô levac di vô nôn nivîha ên i vông xam lêm i vô levac. ¹⁸ Ilage xam vông mone vô Epaplodaitas ên xam nêb i kô mi lam vông vô a ên a kô. Om mone wê xam vông i lam vô a ge tiyi a di luu wê a nêb a ob kô

ge vêl. Om susu ti o ma vô a lêm. Mone wê xam vông i lam vô a ge tiyi xocbê daa wê nivivea nivîha wê xam vông vô Anutu ge. Om Anutu ob yê daa tige nivîha di kô hixôn xéyyaa nivîha. ¹⁹ Il ned Anutu ge tu susu nivîha vihati yang kehe. Om xam susu ti obêc ma ge od Anutu ob vông vô xam i tiyi wê xam nêb xam ob kô ge, ên wê xam tu Yesu Kilisi xe ge. ²⁰ Om il ob pîmil il Mag Anutu i yêp luta lêc luta. Kiyang nôn.

Pol kiyang timuên

21 A nêl vidiien vô xam vihati wê xam tu Yesu Kilisi xe ge. Dì lige vông vinêñ vihati wê dô hixôn a ga, he êno nêl vidiien vô xam. **22** Xomxo vông vinêñ wê vông yuac vac king Sisa ben ge he mi xo xam nginong, om he êno nêl vidiien vô xam, dì xomxo vông vinêñ vihati wê dô vac vigwe tiga ge nêl vidiien vô xam.

23 Vizid niviha wê Apumtau Yesu Kilisi vông ge i viac xam vihati.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fcd1f7ad8